

43
NO SOALAN :23

**PEMBERITAHUAN PERTANYAAN
DEWAN RAKYAT, MALAYSIA**

**DARIPADA : Y.B. TUAN LIEW CHIN TONG
(KLUANG)**
PERTANYAAN : LISAN
TARIKH : 08.03.2018

Y.B. TUAN LIEW CHIN TONG [KLUANG] minta **MENTERI KEWANGAN** menyatakan pendirian Kementerian terhadap cryptocurrency atau mata wang digital, dan adakah Kementerian merancang untuk menggubal undang-undang bagi mengawal selia aktiviti mining, jual beli dan penggunaan cryptocurrency di Malaysia dari segi perlindungan pengguna cryptocurrency, percukaian, pencegahan pengubahan wang haram dan pencegahan pembiayaan keganasan.

JAWAPAN

Tuan Yang di-Pertua,

Saya memohon untuk menjawab soalan daripada Ahli Yang

Berhormat Ipoh Timur, bersama-sama soalan daripada :

Ahli Yang Berhormat Kluang bertarikh 08 Mac 2018, no. 8;

Ahli Yang Berhormat Kampar bertarikh 12 Mac 2018, no. 9;

Ahli Yang Berhormat Tumpat bertarikh 13 Mac 2018, no. 66;

Ahli Yang Berhormat Sungai Besar bertarikh 26 Mac 2018, no. 36;
dan

Ahli Yang Berhormat Bukit Katil bertarikh 28 Mac 2018, no. 21

memandangkan semua soalan yang dikemukakan adalah hampir sama, iaitu mengenai pendirian Kerajaan terhadap penggunaan mata wang kripto, jumlah pelaburan dan statistik mata wang kripto dan langkah-langkah pengawalan dan perlindungan pengguna.

Untuk makluman Ahli Yang Berhormat, mata wang digital tidak diiktiraf sebagai mata wang sah diperlakukan di Malaysia atau mana-mana negara lain, dan pihak Bank Negara Malaysia (BNM) tidak merancang untuk mengiktiraf Bitcoin atau mana-mana mata wang digital. BNM juga pada masa ini tidak mempunyai rancangan untuk mengeluarkan mata wang digitalnya sendiri.

Orang ramai yang menggunakan dan berdagang menggunakan mata wang digital akan menggunakannya atas risiko sendiri dan perlindungan konsumen tidak dijamin di bawah mana-mana undang-undang. Mata wang digital juga terdedah kepada risiko ketidaktentuan nilai akibat aktiviti spekulasi dan penyalahgunaan untuk tujuan pengubahan wang haram, pembiayaan keganasan dan jenayah siber. BNM telah menganggarkan bahawa purata transaksi bulanan yang berkaitan dengan mata wang digital di Malaysia pada tahun 2017 berjumlah RM75 juta.

Berkuatkuasa 2 Jan 2018, mana-mana orang perseorangan atau syarikat yang terlibat dalam aktiviti pertukaran *cryptocurrency* adalah diklasifikasikan sebagai institusi pelapor di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 (AMLA). Kewajipan pelaporan ini bertujuan untuk memastikan langkah-langkah berkesan dilaksanakan terhadap risiko pengubahan wang haram dan pembiayaan keganasan dalam penggunaan mata wang digital, serta meningkatkan ketelusan aktiviti mata wang digital di Malaysia. Antara lain, langkah-langkah AML/CFT (*Anti-Money Laundering and Countering The Financing of Terrorism*) yang perlu diambil oleh penukar mata wang digital termasuklah pelaksanaan usaha wajar pelanggan (*Consumer Due Diligence*) dan mengenal pasti profil risiko ML/TF (*money laundering*

46

*and terrorism financing) mereka, memastikan legitimasi sumber dana yang diperoleh serta mewujudkan kawalan dalaman yang cekap bagi mengesan dan melaporkan transaksi yang mencurigakan. Institusi pelapor tersebut juga akan tertakluk kepada dokumen dasar yang telah dikeluarkan BNM pada akhir bulan Februari 2018. Kesemua pihak yang terlibat dalam aktiviti pertukaran *cryptocurrency* samada individu atau syarikat perlu mematuhi dokumen dasar tersebut.*

Selain daripada keperluan pelaporan di bawah AMLA, penukar mata wang digital tidak dikawal selia oleh BNM pada masa kini. Walau bagaimanapun, sebarang transaksi mata wang digital yang melibatkan aktiviti yang dikawal selia di bawah undang-undang yang ditadbir oleh BNM atau Suruhanjaya Sekuriti Malaysia (SC) seperti pengambilan deposit atau aktiviti pasaran modal tanpa kebenaran yang sewajarnya merupakan kesalahan di bawah undang-undang.

BNM juga telah mengeluarkan pek maklumat mengenai mata wang digital kepada institusi-institusi pelapor sebagai panduan dan rujukan. Di samping itu, perkongsian maklumat dengan agensi penguatkuasa yang lain seperti Polis Diraja Malaysia (PDRM) juga dilaksanakan bagi menangani jenayah komersial membabitkan mata wang digital.

Orang ramai diingatkan agar berhati-hati terhadap risiko penggunaan mana-mana mata wang digital, menjalankan usaha wajar yang perlu dan memastikan mereka memahami risiko penggunaan atau pelaburan dalam mata wang digital. Dari masa ke semasa, BNM akan menerbitkan maklumat yang relevan mengenai institusi pelapor supaya keputusan yang berhemat boleh dibuat oleh orang awam.

SIDANG DEWAN RAKYAT
MESYUARAT PERTAMA, PENGGAL KEENAM
PARLIMEN KETIGA BELAS (2018)

PERTANYAAN : LISAN
DARIPADA : YB DATUK DR. HAJI ABD. LATIFF BIN
AHMAD [MERSING]
TARIKH : 8 MAC 2018 [KHAMIS]
SOALAN : 24

minta **MENTERI SAINS, TEKNOLOGI DAN INOVASI** menyatakan sejauh manakah sumbangan Bioekonomi kepada pertumbuhan ekonomi negara, khususnya pelaksanaan penanaman kontrak yang dilaksanakan di bawah Bioeconomy Community Development Programme (BCDP) untuk membangun tanah-tanah terbiar dan menambah nilai industri pertanian dan pendapatan petani.

JAWAPAN:

Tuan Yang di-Pertua,

Malaysian Bioeconomy Development Corporation Sdn Bhd (BioeconomyCorp) adalah sebuah agensi di bawah Kementerian Sains, Teknologi dan Inovasi yang diberi mandat untuk menggalakkan pertumbuhan industri berdasarkan bio dan produk berdasarkan bio tempatan, di samping membantu dalam mengkomersialkan teknologi berdasarkan bio.

Dalam Fasa Kedua pelaksanaan Dasar Bioteknologi Negara (2011-2015), industri bioteknologi Malaysia telah mencatatkan pelaburan

bernilai RM11 bilion, pendapatan sebanyak RM22.7 bilion dan mewujudkan lebih 31,000 peluang pekerjaan.

Dalam usaha memacu industri bioteknologi tempatan ke peringkat global dalam Fasa Ketiga Dasar Bioteknologi Negara (2016-2020), syarikat-syarikat Malaysia terutama syarikat-syarikat berstatus BioNexus menjadi perintis teknologi berdasarkan bio dengan jumlah pelaburan yang telah direalisasikan sehingga Jun 2017 sebanyak RM3.52 bilion. Sehingga Januari 2018, sebanyak 283 syarikat telah dianugerahkan status BioNexus. Syarikat-syarikat tersebut telah menyumbang sebanyak 10,665 peluang pekerjaan, di mana 3,926 adalah merupakan pekerja mahir (*knowledge workers*) di bidang bioteknologi.

Kerajaan melalui BioeconomyCorp juga sentiasa membantu industri bioekonomi dan komuniti tempatan, khususnya melalui skim perladangan kontrak iaitu Program Pembangunan Komuniti Bioekonomi (BCDP). Program ini menumpukan kepada penghasilan bahan mentah tempatan yang dibekalkan kepada syarikat peneraju untuk diproses menjadi produk hiliran. Program ini, selain bertujuan untuk menambah pendapatan golongan petani, juga dapat mengurangkan kebergantungan terhadap import bahan mentah sekaligus membantu memperkasakan agenda bioekonomi negara.

Sehingga Disember 2017, sebanyak 37 projek BCDP telah dilaksanakan melibatkan penyertaan 2,864 peserta di pelbagai peringkat pelaksanaan di seluruh Malaysia. Projek seperti ini dijangka mampu memberi kesan secara tidak langsung kepada 13,113 penduduk di sekitar projek. Sebahagian besar projek BCDP ini merangkumi penglibatan penghasilan

bahan makanan seperti madu, cendawan, nanas, herba, pisang, tiram dan rumpai laut.

Salah satu contoh projek BCDP ini adalah Projek Penanaman Nanas di Lekir, Perak. Pihak komuniti seramai 20 orang peserta telah membangunkan tanah milik Perbadanan Pembangunan Pertanian Negeri Perak yang berkeluasan 49.4 hektar. Melalui BCDP, tanah-tanah terbiar yang dikenalpasti akan dapat dibangunkan melalui aplikasi teknologi bioteknologi dan perladangan kontrak untuk menambah nilai industri pertanian dan pendapatan petani.

Syarikat peneraju juga menyokong aktiviti perladangan kontrak ini dengan menyediakan teknologi iaitu kaedah penanaman yang terbaru dan latihan kepada komuniti. Ini bagi membolehkan petani mempertingkatkan pengeluaran, standard dan produktiviti.

Tuan Yang di-Pertua,

Di bawah BCDP ini, rakyat yang juga ahli komuniti kawasan terpilih telah menanam tanaman bernilai tinggi tertentu yang kemudiannya dibeli oleh syarikat peneraju berstatus BioNexus atau Pemilik Projek Program Transformasi Bioekonomi (BTP). Usaha BioeconomyCorp dalam mengumpulkan syarikat-syarikat BioNexus dan pemilik projek BTP adalah bertujuan untuk terus memperkasakan industri berdasarkan bio dalam bidang pertanian dan ternakan. Sehingga kini terdapat sebanyak 58 syarikat BioNexus dalam bidang Bioteknologi Tanaman, 33 dalam bidang Bioteknologi Akuakultur dan 26 dalam bidang Bioteknologi Ternakan.

Sekian, terima kasih.

51

SOALAN (25)

**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN

TARIKH : 8 MAC 2018
[KHAMIS]

DARIPADA : YB DR MICHAEL JEYAKUMAR DEVARAJ
[SUNGAI SIPUT]

SOALAN :

YB DR. MICHAEL JEYAKUMAR DEVARAJ [SUNGAI SIPUT] minta **PERDANA MENTERI** menyatakan kesanggupan Kerajaan menggunakan USD5.50 per kapita sehari untuk menetapkan Pendapatan Garis Kemiskinan berdasarkan perakuan Bank Dunia bahawa USD5.50 merupakan pengukur yang munasabah untuk negara seperti Malaysia yang diklasifikasikan sebagai 'Upper Middle Income'.

JAWAPAN:-

Tuan Yang di-Pertua,

Untuk makluman Ahli Yang Berhormat, Pendapatan Garis Kemiskinan (PGK) yang digunakan di Malaysia pada masa ini mengambil kira keperluan minimum makanan dan bukan makanan bagi sesebuah isi rumah miskin bagi membolehkan mereka berfungsi dalam aktiviti ekonomi. Keperluan minimum ini kemudiannya diselaraskan dengan harga setempat supaya nilai PGK memberi gambaran yang saksama dan boleh dipercayai.

Berdasarkan Penyiasatan Pendapatan Isi Rumah 2016, PGK nasional yang digunakan adalah bersamaan dengan RM32.66 sehari atau USD8.16 sehari (berdasarkan tukaran RM4.00 = USD1.00) iaitu jauh lebih tinggi daripada saranan Bank Dunia iaitu USD5.50 sehari. Oleh yang demikian, Kerajaan tidak melihat adanya keperluan untuk menggunakan kadar PGK seperti saranan Bank Dunia tersebut.

Sekian. Terima kasih.

Mac 2018